




**PRATICALINGUA**  
BASTIA - CORTI - MURIANI



# ANTICHITÀ

U 17 di settembre di u 2019

Nome :

Casata :

Puntu generale di storia di l'antichità in Corsica

Un parleremu quì di tutti i populi chì sò ghjunti in Corsica nanzu à i Rumani. Ma mentueremu quantunque stu scrittu chì parla d'una tradizione : Populonia, cità etrusca, sariastata fundata da i Corsi. A ci dice un certu Maurus Servius Honoratus, un grammaticu latinu di u quartu seculu nanzu à Cristu, in u so cummentu di l'Eneida di Virgiliu, publicata versu 20 n.à.C.

À u cantu X, versu 172 dunque, u famosissimu pueta rumanu ci ampara chì a cità di Populonia hà premunitu 600 giovani guerrieri per aiutà l'eroe Enea. È Servius cummentendu stu versu ci spieca :


Quidam Populoniam (...) populum ex insula Corsica in Italiam venisse et condidisse dicunt: alii Populoniam Volaterranorum coloniam tradunt. alii Volaterranos Corsis eripuisse Populoniam dicunt.

*(Certi dicenu chì (...) un populu hè ghjuntu da Corsica in Italia è hà fundatu à Populonia ; d'altri contanu chì Populonia era una culunnia di a ghjente di Volterra. D'altri torna dicenu chì i Volterrani anu strappatu Populonia à i Corsi.)*

In l'annu 264 nanzu à Cristu, Corsi è Sardi sò alliati à l'Imperu cartaginese d'Africa. Tandù schiatta una guerra tremenda trà e duie più grande putenze di l'epica : a Republica di Roma è Cartagine. Roma hè una putenza terrana è pulitica, Cartagine una putenza cummerciale è marittima. Sta guerra zinga focu à tuttu u punente mediterraniu. Alalia hè presa è brusgiata da cima à fundu da i Rumani in l'annu 259 n. à C. In fatta fine vince Roma.


## A Corsica rumana

111 nanzi à C / 476 dopu à C



## Lucius Cornelius Scipione

Lucius Cornelius Scipione, era generale è omu di Statu rumanu di a granda famiglia di i Scipì, branca di a ghjente Cornelia.



U babbu era Cunsulu (Lucius Cornelius Scipione Barbatus) è u diventa ancu ellu in u 259 nanzu à Cristu. Hè ellu chì, appena numinatu, cunquista a Corsica è a Sardegna, mandatu da u Senatu rumanu cù una flotta tamantona. L'invasu di a Corsica era statu decisu cinqui anni nanzu, mentre a prima guerra punica.

Dopu d'esse statu fattu Cònsulu, piglia Alalia di notte (tandu abitata da Cartaginesi, Grechi è Etruschi à bulegghju) è ne face l'Aleria rumanu. L'annu dopu, hè fattu Censore.

Hè scrittu nantu à a so tomba in Roma :

*Hunc unum plurimi consentiunt Romae*

*bonorum optimum fuisse virum*

*Lucium Scipionem. Filius Barbati,*

*Consul, Censor, Aedilis hic fuit.*

*Hic cepit Corsicam Aleriamque urbem*

*dedit tempestatibus aedem merito.*

*(In Roma, parechji accertanu chì st'omu, Lucius Scipione, hè statu u migliore trà i boni citatini. Figliolu di Barbatus, fù cònsule, censore è edile. Hà pigliatu a Corsica è a città d'Aleria. Cunsacrò un tempju à e tempeste in ritornu.)*

Finata sta prima guerra chjamata "punica", schiatta in Africa una rivolta di i mercenarii cartaginesi contr'à a città punica. A republica rumanu n'è prufitta per impatrunisciesi d'Alalia in Corsica è di e pusessione puniche in Sardegna in u 238 n. à C.

Da tandu principia a guerra di cunquista di l'isula sana da i Rumani. I Corsi aspettanu i Rumani in i passaghji, in e zenne è e ruine per assaltàli, ma i cunfronti si passanu dinò in piaghja.

Ci sò parechje stonde in stu cunflittu :

- In u 233 n. à C., u rumanu Glisea face a pace cù l'isulani ma u trattatu hè ricusatu da u sinatu rumanu è Glisea hè mandatu à i Corsi quant'è prighjuneru;
- In u 231 n. à C., e legione di Caius Papirius Maso piglianu a suprana à a battaglia di u Campu di e Morte (Fium'orbu d'oghje) ;
- In u 231 nanzu à Cristu, facini di Corsica è Sardegna una pruvincia sola sott'à u cummandu militare d'un Pretore. Saranu spiccate e due isule sott'à Augustu, in l'annu 6.

E rivolte contru à i Rumani sò parechje : 191 nanzu à Cristu, 2 000 isulani sò tombi ; 172 nanzu à Cristu, 7 000 morti è 1 700 prighjuneru mandati in Roma. Di più, à a Corsica li tocca à pagà un tribbutu di centu tonne di cera ! A cunquista di l'isula finisce in u 111 nanzu à C. cù l'ultima rivolta cunnisciuta.

A carta di Ptulemeu, à u ll' seculu, conta 31 cità (17 nantu à a costa è 14 à l'internu) è parla di 12 populi chì campanu ind'i borghi, vale à di senza drittu di stabilisciesi in e cità.

A rumanizzazione si stende partendu da i porti impurtenti : Aleria, Mariana, Aiacciu, Sagona o Calvi. U paisaghju cambia cù e culture di a vigna, di l'alivu è di u granu fatte à l'usu rumanu. Certi anziani di e legione sò arrughjunati nant'à e terre di Mariana (da Marius) o d'Aleria (da Silla). A muneta è a lingua latina piglianu a suprana nant'à i vechji usi corsi fendu di l'isulani Corsi-Rumani.

A Corsica produce tandu :

- Legnu da fà i battelli (tavule è maghji di lariciu)
- Rasgina è pece da tuppà i battelli
- Suvaru adupratu per l'elmi, i scudi, i tappi d'anfuro, e rete per a pesca (una scrizione in Aleria ammenta « 15 cità sottumesse à l'impositu di u suvaru »)
- Cunchiglie (l'ostriche di u stagnu d'Urbinu eranu aperte cù un cugnu quatratu di ferru chì s'hà lasciatu e so tracce nant'à a cunchiglia di sopra. Sò cusì l'ostrice trove ammansate à mezu à i terragli rumani di Piantarella. Si pensa chì a parte di sottu cù l'animale era messa in salamoghja eppò mandata in Roma).
- Pesci seccati ; granu ; cughjame ; cera ; mele ; oliu ; vinu.

Parti è più di sti prudutti sò mandati in Roma è certi sò belli apprezzati nant'à i tavulini di i patrizii rumani (nobuli).

- in u 176 n. à C., Corsi è Sardi sò scunfitti da Tiberius Gracchus (15 000 morti !)

- in lu 173 n. à C., Claudius Cicerius vince i Corsi in una battaglia chì fece 7 000 morti è 1 700 prigionieri.

L'Isula si spupuleghja per via di tutti ste guerre, l'ultima rivolta hè ammatata da u prefettu rumanu Metellu in u 111 n. à C. : ghjè a fine di a cunquista rumana di l'Isula è ci hè vulsutu circa 150 anni !

### Seneca è a so torra

A torra di Seneca hè una torra in capicorsu. Hè situata annantu à a cumuna di Luri, sopra à a bocca di Santa Lucia. Hè stata custruita à u XVesimu seculu da a famiglia da Mare. Seneca, u filosofu è puliticante rumanu, ci saria statu durante u so esiliu in Corsica da u 41 à u 49. L'esiliu di Seneca finì quandu Agrippina, a moglie di l'imperatore Claudiu, riescì à ottene u so riturnu da l'esiliu è u scelsi com'è tutore di u so figlolu di prima lettu, u futuru imperatore Nerone. Ma issa passata di u sughjornu di Seneca in a torra ferma incerta è più probabilmente, Seneca serà statu in Mariana o in Aleria.



Ellu scrisse parechji affari nantu à a Corsica. D'una certa manera, micca sempre belli ricordi di u so esiliu :

« A sorte mi hà lampatu in un locu induve l'alloghju u più largu hè un pagliaghju [...] ci serà qualcosa di più goffu ch'à stu locu ? [...] Terra orribile induve ùn si vede ch'à diserti dapertuttu [...] Qui omu ùn trova pane per stantà a so vita, nè acqua per attagnà a sete, nè fucarone per a so scera... »

Scrive dinù : « Vindicàsi hè a prima lege di i Corsi, a seconda hè di campà d'arrubecciu, a terza hè d'ingannà, a quarta hè negà i dii ».

Ma quand'ellu vulterà in Roma, scriverà dinù : « Eru bellu più felice in a mo ritirata sulitaria, induve u mare di Corsica mi cinghja da u so borru... Incù meraviglia fighjulava u cele, capidopera di a natura... È a corsa in armunia di l'astri, u pisà è u calà di u sole. È u splendore spampillante di a volta celinca. »

## Strabone

In u so libru « *Geografia* », tra u 21 è u 23 dopu à Cristu, scrive : « Kurnos, chjamata Korsika da i Rumani, offre solu un alloghju disgraziatu, perchè hè assai scuscesa è per a maiò parte completamente inaccessibile, à tal' puntu chì i nativi chì tenenu e creste è campanu d'arrubecciu, sò peghji ch'è e bestie salvatiche. Quandu i generali Rumani facenu una incursione è cascanu nantu à una furtificazione, riportanu una grande quantità di schiavi è allora omu pò vede da vicinu a strana fisionomia di s'omi salvatichi, cum'è e bestie di i boschi, o baulli cum'è e vacche, chì ùn supportanu micca di campà in schiavitù, o chì, se ùn si lascianu more, stumacanu i so maestri chì l'anu compri cù a so apatia è insensibilità, finu à chì i maestri si lamentanu di i pochi soldi chì li anu custatu (...)

Strabone dà una descrizione di e coste di Corsica da u Sud à u Nord :

### Descrizione di a parte occidentale :

Cità di Palla

Portu Siracusu

Cità di Rhoubra

Prumontoriu Graniakon

Cità d'Alista

Portu Philonios

### Descrizione di a parte orientale :

Bocca di u fiume sacru

Culunia d'Aleria

Bocca di u fiume Rhotanos

Portu d'Artemis

Cità di Mariana

Prumontoriu Ouagon


Cità di Mantinon

Cità di Klunion

Parechje scale di i Goti in Corsica sò insignate da scritti antichi versu l'annu 412, ma pochi rinsignamenti veninu par spiegà l'epica, quandu sti barbari fecinu spedizione contru à Roma à a fine di u Vtu seculu.

A venuta di i Vandali hè cunnisciuta di più. Dopu à u 392 è a morti di Valintianu, i Vandali piglianu pusessu di l'isula. Si sà chì trà u 477 è u 484, l'ariani ci esilianu una mansa di veschi africani catolichi cundannati à taglià u legnu da fà ne vascetti.


A carta di Ptulemeu, à u llù seculu, conta 31 cità (17 nantu à a costa è 14 à l'internu) è parla di 12 populi chì campanu indè i borghi, vale à di senza drittu di stabbilisciesi in cità.



Secondu Pliniu, i Rumani dividenu l'isula in 33 *civitate*, una *civitas* essendu una cumuna straniera: una cità, una cumuna o una culonia, era cumposta, fora di a cità quandu ci era, di un territoriu di più o menu ampiezza. Questu territoriu cuntene *vici* (borghi), *pagi* (paesi), *castella* o *oppida* (piccole furtificazione), grande proprietà è tenute, *fundi*, *villæ* è *prædia*. Sta ultima espressione hè stata priservata è, sottu u nome di presa, i Corsi davanu stu nome à a parte cultivata di u territoriu invece di a parte riservata à passaghju liberu.

Trà e cità, cità o culoni indicati da Pliniu, pudemu ammentà Mantinum (Bastia), Urcinium (Ajaccio), Palla (Bonifacio), Calvi, San Fiurenzù, Centurinum (Centuri), Ropicum (L'Île-Rousse), Venicium ( Venaco), Pauca (Propriano), Mora (Bocognano), Tarrabinorum Vicus (Vico), Talcini (Corte), Portus Syracusanus (Porto-Vecchio), Tamina (Macinaggio), Lurinum

(Luri), Opinum (Chiatra), Nebbio rovinata, Mariana rovinata, Pino, Ponte d'Arco, Canarie, Ostricone, Aleria rovinata, Marianum Promontorium (Casa Barbarica), Sartene, Balagne, Girolata ...



### U SITU D'ALERIA



Dopu una nova sbarcata di i Goti, vèneranu à stabbiliscesi i Bizantini chì urganizeranu l'amministrazione isulana, purtendu u paese versu u Medievu.

L'isula diventa pruprietà di a chjesa. E cità impurtente sò Marinianis (Mariana), Colonia Iulii (Aleria), Turrinum (Nebbiu supranu ?), Coenicum (Cinarcia, Sagona ?) è Agiation (vechju Aghjacciu). Si pò vede quì a nascita di 5 viscuvati, di cinque lochi di primura per l'economia, l'amministrazione, a pulitica è a religione. Da quì si spargherà u cristianisimu, partendu da a costa versu e serre.

I scritti di u Papa Gregoriu u Maiò (590 - 604), chì trattanu di l'urganizazione di a Chjesa in Corsica, ci insegnanu chì nant'à i cinque viscuvati (Mariana, Aleria, Sagona, Opinon è Figari), dui ùn sò pruvisti di vescu. Si leghje dinò ch'ellii sò pochi fattivi i preti è chì u paganisimu hè bellu presente.

E sole testimonienze di e credenze pagane sò scritti da stu Papa Grigoriu chì chjama in Corsica à a cristianizazione di quelli chì si sò vultati versu u cultu di l'idole « per lasciacorre o necessità », dumanda d'un micca onorà l'idole di legnu o di petra, è ancu una crescita di i battesimi cù una conversione di a ghjente « ancu cù a paura ».


L'isula lasciata da Bisanza passa sott'à a duminazione longhibarda.

### A vostra cuntribuzione

**1 - Lucius Cornelius Scipione hà messu a cultura corsa pre latina à caternu. Cosa li puderiamu mandà cum'è messaghju, à stu generale ?**

**2 - Site un suldatu rumanu di a prima legione mandata per cunquistà a Corsica. Scrivite u vostru parè nantu à a vita di l'omi di quì.**

**3 - Piazzemu i lochi di a carta di Tuemeu nantu à a sta carta muderna di a Corsica :**



#### 4 - Cosa ci ferma oghje, da i tempi rumani ?

##### Referenze è risorse

---

- A Piazzetta - Roma, cità corse (10 di maghju di u 2015)
- Denis Luciani - Storia di Corsica illustrata - CRDP di Corsica - 2014
- Olivier Jehasse - Corsica Classica - 2010
- [https://www.educorsica.fr/storia\\_di\\_a\\_corsica/](https://www.educorsica.fr/storia_di_a_corsica/)